

東
華
續
錄

東華續錄

乾隆七十六

臣王先謙敬編

臣周潤蕃恭校

秋七月甲午朔諭軍機大臣等前據彰寶奏緬匪頭目得魯蘊自老官屯差孟矣等四人至長青等軍營稱得魯蘊因辦送貢禮還人前來之事差伊等送信請將原差之擺夷奔線等二人換回自行定限於六月初十日得魯蘊親自到關納貢還人一摺會諭以如果緬匪心出於誠將所留內地官員盡行送回原不妨允其所請今據彰寶奏到初十日僅有紅瓊等物差擺夷拉撒等二人到關云與大人們送禮詰以納貢還人之語據供奔線同時也會聽得後卽不見說起等語其事殊不可解得魯蘊以緬子四人換回兩擺夷其多寡輕重已覺不值卽以爲後來四人非真緬子而原

差之羅夷二名係彼要人來此探聽信息亦不可知但奔線等不
過至張鳳街所見亦止長青哈國興無由得知內地消息何以甫
經放回復改前說緬匪果屬詭詐難信亦不應變幻出於情理之
外至所稱哈國興是否在營其說尤屬難曉哈國興雖在滇稍久
緬匪略知其名然並未曾帶兵多殲賊眾何至獨爲其所畏且非
哈國興在彼內地豈別無將領鎮守而沾沾以此爲問豈邊備之
有無轉恃一哈國興乎彰寶將拉撒等拘留同孟矣等一併嚴訊
解京所辦甚是此後或果得魯蘊親自款關將所留內地官員盡
行送回悔罪納貢體察屬實原不妨仍遵前旨酌辦若似此虛誣
難據無論幾人幾次槩行羈留不放見在籌辦亦止可如此或賊
匪思欲乘便侵擾近邊則沿邊關隘見俱有兵駐守正可趁此截
勦使之畏懾諒彰寶亦斷不致疏懈弛防也至所稱俟冬初機有

可乘卽奏明襲擊之語則其言非本誠心且襲擊雖與進剿不同然亦必有堪勝統兵之將及嫻習領隊之員方於事有濟今溫福及侍衛等俱調赴四川辦理攻剿金川之事滇省見更無人豈彰寶長青卽能勝襲擊之任乎設所辦不得要領非惟於事無益轉恐爲賊所藐視斷不宜輕舉妄動卽孫爾桂日前欲襲孟良之說亦不可行總宜靜以俟之使賊人見內地數年竟不出兵無從窺見端倪難以揣測將來乘其無備一爲襲擊自可得力而禡賊人之魄方爲妥善將此由六百里傳諭彰寶知之○乙未諭川省辦理軍營糧務甚屬緊要西路已派侍郎劉秉恬專辦其南路運糧事宜原係阿爾泰專辦但伊年已衰老辦運恐未能妥速著派侍郎鄂寶卽行馳驛前赴南路會同阿爾泰督辦並給與欽差大臣關防○丁酉寶授勒爾謹陝甘總督○戊戌諭軍機大臣等軍行

糧餉不繼所關甚重朕因此益增繫念阿桂向來遇事持重此次進攻必實有可進之機斷不致冒險輕進見嚴飭阿爾泰上緊趲運軍糧以資接濟朕惟盼捷音速至耳又諭阿爾泰自上年賞給散秩大臣令其專辦糧務伊久任川省總督文武皆其舊屬不得諉爲呼應不靈何辦理半年餘尙貽誤若此阿爾泰著嚴行申飭今阿桂見由東山覓閒進兵糧食所關尤爲緊要阿爾泰務卽上緊辦運以資接濟若有遲誤惟阿爾泰是問見派鄂寶往南路同辦糧運阿爾泰儻稍存倚仗推諉之心則自取罪戾矣○辛丑諭軍機大臣等前此薛琮由墨壘溝進攻告急時桂林曾令宋元俊帶兵赴援渠以不得進路爲詞去而復返又欲改由革布什咱取道亦未成行已有遲誤之咎其於桂林用銀贖人一款種種情節俱不能無罪因念其於番地情形尙所熟悉特從寬宥仍令帶兵

往綽斯甲布督率土司兵練進攻宋元俊如知感恩奮勉實心籌辦將來功罪原可相抵若竟能得間架入搆穴擒渠必更膺酬勳渥典或竟意存觀望惟蹈綠營虛誇積習則其取戾更大宋元俊自遊擊不數月擢至總兵受恩較常人尤重益當力圖自勉朕辦事一秉大公禍福惟其自取將此嚴切飭諭宋元俊知之○癸卯諭軍機大臣等阿桂從東山梁進攻雖得有數卡殲戮賊番及其頭目兵氣稍覺奮揚但以路險山高不敢深入旋即撤回仍屬有名無實是該處形勢進取頗難據阿桂另摺奏稱昭通湖廣兵各三千名到日可期得力如果阿桂訪有僻路可繞過僧格宗前後夾攻添此新到之兵自屬甚善若不過漫爲籌畫何如仍遵前旨將續調及見有餘兵槩行調往西路併勢進攻阿桂仍駐紮南路以綴賊勢遇有罅隙仍可相機進剿是南路坐收牽掣之功西路

實資多兵之助著傳諭阿桂速行妥議具奏○乙巳諭入旗補放步軍校無庸帶赴避暑山莊引見著為例○丁未定道府以上等官如有同胞及同祖兄弟叔姪同在一省俱令官小者迴避○戊申諭阿桂此次辦理甚屬用心奮勉著加恩賞戴花翎至綽斯甲布等差人投稟尤爲極好機會自當速籌進取所有該處軍糧飭令阿爾泰卽行趨運並著文綬加緊督催毋稍遲緩○己酉諭前派色布騰巴勒珠爾審訊伍岱捏參溫福一案色布騰巴勒珠爾護庇伍岱並未將伊詳審轉將溫福無關緊要事件反復按尋治罪亦所自取但其人本糊塗尙非有心壞事者可比至伍岱意欲參奏溫福自占地步亦屬小人常態但無顯然實證朕亦豈肯以未行之事苛求治罪著施恩將色布騰巴勒珠爾撤去黃帶在家圈禁伍岱著發往伊犁自備資斧效力贖罪並諭中外知之○丁

已諭阿爾泰前在山東巡撫任內實心察吏安民克副任使因擢授四川總督其於地方一切政務仍復認真且聞其偶爾卧疾卽於枕上辦公益憐而嘉許之是以特加恩簡任綸扉仍膺封疆重寄前此因修建天壇鎧竿需用枅木材料尺寸較長而大行令川省採運前任督臣未經辦及阿爾泰到任後卽購得委員解京會將伊及辦解之員議敘並加賞賚仍令其將採辦工價報部開銷伊因解送鎧竿之便曾順帶木植料件據稱伊將養廉銀三千兩指辦初以其出自惻忱留於工程備用旋卽降旨以後停其購解見有軍機處檔案可查乃近日聞其曾向人言有將來必因此累及之語卽此已見其昧良飾詐豈受恩任事之大臣所宜出此至小金川一事固由阿爾泰經理不善然其初以小金川與沃克什土司蠻觸相爭原不值輕議加兵且因其時征勦緬匪之事未

竟豈宜復興軍旅因諭令妥協撫馭以靜邊隅及阿爾泰等親至
土境面諭僧格桑悔罪受約退地歸巢遂亦宥其既往此實朕不
欲勞師動眾之本懷若當時出自阿爾泰之意希圖將就了事以
致逆酋無所顧忌養癰貽患必早將伊明正典刑矣此實番夷重
務朕未能先幾果斷惟自悔前此之姑息必不肯諉過臣下是以
於阿爾泰格外原宥卽伊獲罪罷斥之後旋即賞銜任用如昔年
皇祖時有欲撤三藩之意下大臣等集議惟米思翰明珠以爲
應撤遂卽允行及吳三桂叛逆廷臣中因有請誅建議撤藩之人
者皇祖以其事斷自宸衷不肯歸罪臣下曾頒明旨宣示
朕之不加罪阿爾泰亦惟守祖訓爲權衡耳至兩金川均係內
地土司乃僧格桑與索諾木狼狽爲奸敢於自作不靖抗拒王師
而索諾木竟敢幫兵助逆其情罪深爲可惡若不併爲剿滅兩酋

必更逞其兇逆恣肆橫行漸至吞併附近各土司聯爲一氣甚或
侵及內地皆不可知尙復成何事體此在事勢機宜實有難於中
止之局朕於邊務番情惟欲計及久遠萬全之策並非好爲窮兵
黷武也且自辦軍務以來朕宵旰運籌不能稍暇甚至盼望軍書
竟夜廢寢朕亦何所利而好爲煩勞若此乎況兩金川久隸版籍
更非若準部回部可比因其叛而申討理所當然卽速爲剿定於
中國境壤初無所增實與唐時之平淮蔡無異雖其地較淮蔡稍
遠亦不足言勦績又豈得疑朕爲好大喜功乎朕用兵不得已之
苦衷屢降諭旨甚明茲復將此詳晰宣布俾中外咸喻朕意至阿
爾泰自上年冬加恩賞給散秩大臣銜令其專辦糧務伊久任總
督運糧員弁皆其舊屬何至呼應不靈近復令其署理督篆尤當
上緊籌辦乃於南路軍糧節次遲誤見在籌及綽斯甲布一路分

兵攻勦專待糧集進發昨據阿桂奏阿爾泰辦理此路兵糧催趲
幾及一月尙無運到者則是伊有心貽誤軍務實在於此乃伊每
向人言金川一事將來必致貽累頃竟奏稱年衰昏憤運糧事務
亦不能勝任請革職留於軍營效力俟軍務告竣另請當差等語
是始終不肯以國事爲念惟圖置身事外倚老負恩天良何在阿
爾泰著革職拏問交與文綬派員看守候訊將此通諭知之○戊
午軍機大臣刑部等奏審訊原任雲南布政使錢度侵欺勒索贓
私屬實應請旨卽行正法從之○以錢鑒爲陝西按察使由甘肅
調陝西
○己未諭據弘昉奏閩海關各口岸委員徵收稅課請咨部分
記功過一摺所辦非是各關口分派委員稽察就其勤惰分記功
過以示勸懲乃該管關衙門自應酌辦之事本非可由部議敘議
處是以前歲弘昉條奏時卽批不必交部令與鍾音詳酌辦理嗣

據鍾音議覆此款應聽該衙門自行辦理而文員考覈功過毋庸另辦因爲允行今弘昉奏到竟按分數盈絀開列清單請咨部稽覈殊屬瑣屑不成事體國家設立權關原以稽查姦宄巡緝地方卽定額抽徵亦恐逐末過多藉以遏禁限制至各口岸商船出入每月多寡不同稅額卽因之盈縮豈能豫爲定數且委員等如果有多徵少報及勒索賄放等情弊查出卽應治罪若因此繁設科條按月額爲殿最非惟事涉紛繁不成政體並恐委員等畏過貪功違例浮徵苛刻商賈其流弊將無底止卽如昨歲淮關監督方體浴因上年過關船少額數不足遂爾多方煩擾轉致商販裹足不前經朕察其辦理不善將伊交部嚴加議處卽寓防微杜漸之意朕辦理庶政務崇大體從不肯爲繁碎難行之事至徵權一事惟嚴稽官吏之侵剝不使絲毫累及商民弘昉所奏不可行並著

傳旨申飭仍通諭中外知之○庚申阿桂奏西路軍營以沃克什爲正路而曾頭溝爲協剿之師南路以卡了爲正路而綽斯甲布革布什咱爲協剿之師必卡了一路軍威強盛則南路各土司方可藉以無恐且見在溫福一路擣小金川之東又有曾頭溝一路以據其北若卡了再得多兵搗其西南賊番腹背受敵必難支禦若將南路調撥所餘及續調未到官兵歸併西路約咱一帶止爲駐守之計則是名爲三路實僅有兩路賊番窺南路力單必撤其精銳潛赴曾頭溝沃克什等處固守恐西路亦未必能卽速奏功論軍機大臣等阿桂覆奏南路之兵不宜分往西路所奏甚是所有南路節次調派之兵應仍歸阿桂統領妥辦昨據溫福議將第五次調赴南路之陝兵二千改赴西路如見在未赴西路卽令其仍歸南路備用而以續調之湖廣兵二千調往西路若前項陝兵

已赴西路軍營卽將湖廣之二千兵調赴南路著傳諭溫福阿桂酌量檄調並諭令陳輝祖知之

八月丙寅溫福等奏木坪土司甲爾參納木卡瓦寺土舍索諾木雍中並續派土兵協剿懇請酌量獎勵諭軍機大臣等甲爾參納木卡索諾木雍中俱著加恩賞戴花翎並賞甲爾參納木卡誠勤名號索諾木雍中謹慎名號以示鼓勵○己巳諭據阿桂奏報七月二十一日由墨壠溝一路晝夜進兵於二十二日五更至甲爾木乘大霧瀰漫之中攻據山梁連得石卡二十餘座石礮四座木柵一座賊人披靡奔逸經官兵追擊殲戮甚多並殺死頭目一名又將路通金川之格魯克古地方派兵占住等語阿桂自到南路軍營以來督勵將士調度得宜今復乘閒襲據山梁殲賊甚眾直壓僧格宗賊巢又分兵控扼金川要險軍威大振殊屬實心任事

阿桂著加恩授爲內大臣其在事之將領弁兵等實力奮勉均屬可嘉著交部查明一併議敘○諭軍機大臣等布拉克底土司安多爾巴旺土婦伽讓俱各督派所屬土兵隨同大兵進剿誠悃可嘉安多爾著賞戴花翎並賞恭順名號伽讓著賞恭懿名號並賞段四匹以示鼓勵○王申諭昨兵部將揀發雲南武職人員帶領引見內由綠營漢官揀用者止有一員詢之該部因向來遇有揀選漢員內合例者甚少未經保送到部是以多將各處保送之滿洲人員揀補但思綠營將領雖屬滿漢參用亦必須所占員缺多寡適均方合體制若似此槩將滿員揀發行之日久勢必綠營盡成滿缺非所以廣掄選而勵人材卽或成例稍有窒礙難行亦何妨斟酌變通俾武臣登進之途益昭公允著卽交與兵部將揀選武職人員如何立法令滿漢間用之處另行詳悉妥議具奏至巡

捕營各員本在應行揀選之列因該員等俱有降級留任及停升處分爲例所格不能與選第京城人眾事繁巡捕營有巡緝專司該員等易干吏議覈其情節多屬因公不至遞阻其上進之路嗣後巡捕三營官員見有降級停升處分者遇應行揀選時仍准其一體揀選其處分之案卽令其帶於新任尋奏巡捕營員業蒙恩旨凡有降級停升處分俱准與選嗣後請將行走已滿二年之漢侍衛與巡捕營八旗滿洲蒙古人員令各該管大臣保送請派大臣會同揀選引見記名後遇各省奏請揀發卽與在部候補候選者按滿漢分派引見將次用完再照此辦理如請發多人而在京漢員不敷揀選請於需人之鄰省將卓異及軍功邊俸應升綠旗人員內論俸擬用仍夾單請旨再查揀發人員例補題缺而武職題缺多沿邊沿海苗疆要缺必先儘本省豫保之員伊等未免守

候嗣後請將揀發豫保人員相間題用如應用揀發而人地不宜許該督等於本省簡缺內對調從之○乙亥四川總督文綬奏鄂寶改赴西路劉秉恬尙在西路未回見阿桂乘勝進攻糧務緊急調夫應用經糧員飛稟阿爾泰乃並不拆視直送省城臣見卽馳赴南路督率催辦諭軍機大臣等阿桂攻克甲爾木山梁調夫一千名應用阿爾泰接到糧員飛稟槩不開視轉迂道郵送成都於軍糧重務視同膜外實屬有心貽誤前將阿爾泰革職拏問著文綬將此情節併案嚴訊定擬具奏○戊寅 上自避暑山莊巡幸木蘭行圍○諭軍機大臣等阿桂奏官兵因風雪雨雹氣候寒冷將已得之甲爾木山梁退回不守見今七月下旬卽使雨雹交作何至頓改寒暄此必係緣營惟怯架詞撤退明亮等若於其時詢明倡議之二三人駢誅示眾軍心自定乃見不及此隨同撤回實

有應得之咎領隊大臣隨從將軍參贊固不可任意專擅若獨當一面遇有怯懦弁兵難於約束卽於陣前斬徇以肅軍紀此又與專擅者不同如見在甲爾木官兵竟將已得之地棄而弗守似此軍令廢弛何以鼓勵戎行阿桂可弗憬然動念乎此次著照阿桂所請明亮降爲二等侍衛烏爾圖納遜降爲四等侍衛念係初犯僅予薄懲若不知儆惕復蹈前車軍律具在不能復爲寬宥也至退兵一節或被時實係雪後風寒我兵衣單難禦卽勉強駐守山梁究竟不能施展萬一賊番乘機掩襲更覺不成事體則全軍退回未可盡謂之失計但在阿桂權宜酌辦則可將領以下不得援此藉口也再官兵退回正恐繼進不易如其地難以急圖窺入又當於綽斯甲布一帶分途並進以爲牽制金川之計總之軍行機要務在隨時斟酌合宜著傳諭阿桂就見在情形悉心籌畫具奏

以慰懸念○庚辰諭據周元理奏永定北運二河並淀河之千里長隄及天津之格淀隄等處修築竣工請親臨閱視指示機宜通省士民得遂望幸之忱倍深踴躍等語畿甸河工水利關係民生朕廑念閭閻勤求至計屢經巡省期慶安瀾上年因積潦稍多特命重臣前往勘畫並大發帑金詳議興修俾儲洩咸宜田廬共資利賴見在工作方成仰荷天庥告瑞秋收豐稔物阜民和自當及時酌定章程用垂久遠且畿南一帶羣黎生計尤切於懷正思親歷周咨覘悉其景象盈甯以慰連年瞻念允宜曲徇輿情俯從所請著於明歲仲春諏吉恭詣泰陵禮成卽順道臨視淀河及永定下口由水程進莅津門還閱北運河工相度疇咨以答惻忱而籌鞏固副朕軫念畿氓至意並著周元理嚴飭所屬所過但可略事埽除毋得稍有增飾繁費○癸未諭前據阿爾泰宋元俊會

參桂林乖張欺罔一案如稱薛琮在郭舟山一帶具稟告急桂林並不派兵救援甚至有將銀向金川贖取迷失兵丁之事實堪駭異因將桂林革職拏問特派福隆安馳往軍營勘問如查審屬實卽欲將桂林在軍營正法示眾旋據福隆安審明桂林並無造屋居住驕縱不法各款至薛琮告急稟至桂林卽派宋元俊赴援彼未得路前往其發銀贖取兵丁一節係司員汪承霈及知州曹焜等以布拉克底巴旺土兵尋覓綠營迷失之兵頗爲出力向糧員取銀備賞曾經稟知桂林支發並非欲賞金川之人並弔取宋元俊所封糧餉簿冊覈對其取銀日期適當布拉克底巴旺覓回兵丁之際確鑿可據實與金川無涉並審有宋元俊構陷串飾情節則桂林尙非法所難貸但其在軍營日親麪羹食飫珍羞止圖己身安逸不能與士卒同甘苦且北山梁損傷兵丁數目並不查明

據實陳奏意存掩飾亦不得謂之無罪但未若原參之甚耳桂林前歲由山西按察使進京陛見看其人尙曉事可以造就旋即擢爲侍郎令在軍機處行走冀得學習有成其於軍務本未經練上年以阿爾泰等辦理因循節節貽誤因派桂林前往察看原非欲畀以封疆重寄後因其陳奏軍營諸務頗屬實心且中竅要而阿爾泰日益衰庸誤事是以卽授桂林爲四川總督統領南路官兵伊自受任以後攻取約咱卡了達烏等處董率奮勉甚合機宜以無意中新用之人乃能經理妥協若此實爲喜出望外及閱阿爾泰等參奏則桂林竟爾改弦易轍前後如出兩人又非朕意料所及今旣審明各款非若從前張廣泗之有心貽誤可比覈其情罪尙不至於死桂林著加恩發往伊犁自備資斧效力贖罪交與舒赫德令其在印房學習當差至汪承霈不過隨往辦事司員其與

曹煇林儻相商取銀備賞一節如果向金川贖取不特桂林罪無可寬卽汪承霈等亦當從重治罪今訊明實係備賞布拉克底巴旺之人且經宋元俊汪騰龍屢次教令串供汪承霈不肯扶同諉卸傾陷桂林尙屬具有本心亦著從寬免罪復還其郎中帶革職留任仍在軍機章京上行走黃煇林儻與汪承霈本同一事俱著加恩復還同知知州均帶革職留任交與文綬仍令其酌量辦差宋元俊前經桂林派其帶兵往援薛琮初以無路可進退回旋欲改由革布什咱取道亦未成行已難辭貽誤之咎而於桂林參案從中捏飾咬供意圖傾害本當按律治罪念其自去歲隨征以來頗知奮勉且此次尙屬初犯是以從寬仍留總兵任令其在軍營益加感奮宣力以勵後效朕於諸臣功罪辦理一秉大公從不絲毫稍存成見此次桂林之案如果阿爾泰原奏屬實則其人必不

可留於人世當卽於軍營立正典刑俾共知儆惕朕亦斷不肯稍存姑息今其重款雖已審虛而本分應得之罪自在亦不肯因其經人誣陷並爲原免其餘寬宥各員或恕其已往或勉以後圖亦仍視其人之自取此實朕法外之仁伊等惟當益知感恩畏法將此通諭中外知之○溫福等奏由德爾蘇至貢噶山梁賊番新立礮卡經海蘭察哈國興帶同章京侍衛等攻撲賊不能支遂得搶占二卡其南山梁一帶亦經章京德保等連奪三卡得旨嘉獎○甲申諭各省馬兵取進武生留營食糧仍准鄉試○乙酉諭軍機大臣等據李侍堯奏暹羅國鄭昭稟送粵省海豐縣民陳俊卿等眷口回籍並據河仙鎮莫士麟差人齎送文稟李侍堯擬以己意檄覆兩人俟鄭昭處送到內地民人量爲獎勵以示羈縻亦止可如此辦理但梁上選等係內地民人輒敢糾伴挈眷潛赴外國港

口居住甚屬不成事體此等民人於送到時均應訊明按例懲治沿海居民出口例禁禁嚴守口地方官弁何得任其攜家擅出漫無稽察則平日海禁之廢弛已可槩見著李侍堯查明失察梁上選等出口之該管地方員弁據實參處嗣後仍須嚴飭沿海各口實力稽查毋得稍有疏縱將此傳諭知之○阿桂奏據綽斯甲布土司稟稱金川派兵圖占黨壩官寨黨壩土婦和爾郭求援已發兵往助臣以黨壩附近曾頭溝當卽行知董天弼前往駐防並咨明溫福就近督辦惟是金川爲小金川死力拒守名爲幫助實已併吞今當分兵先攻金川庶可堅各土司歸順之心且使賊番撤回自衛則小金川失恃衆人不難是綽斯甲布一路官兵實難姑待臣令宋元俊剋日起程而宋元俊見請添兵應俟糧運稍充續調兵到酌量撥往諭軍機大臣等綽斯甲布一聞黨壩告急發兵

往助實屬恭順著阿桂酌加獎賞以示鼓勵計賊番到黨壩地方較董天弼進兵之期尙早一日賊近我遠誠恐緩不及事未知董天弼辦理若何至宋元俊帶兵往綽斯甲布旣可得其駕馭之力兼可控扼金川相機襲擊該鎮見請添兵自應酌量派給以厚兵力今已飛諭滇楚等兵馳赴南路阿桂將應派綽斯甲布之兵先檄知帶兵人員卽由打箭鑪徑往○辛卯飭道府州縣等員凡遇丁憂及革職者毋得寄居原任地方○壬辰以韋謙恆爲貴州布政使國棟爲貴州按察使

由淮關監督還

九月甲午阿桂奏據脫出之屯兵供稱索諾木派勒烏圍以上賊番禦西路噶拉依以上賊番禦南路是賊黨鴟張今日之辦小金川與辦金川無異但綽斯甲布土司必俟官兵前進方肯多派土兵助剿而南路各土司又必俟綽斯甲布協助方能實力奮攻是

此路進兵尤急近因宋元俊染病稍遲數日俟其病體稍愈糧運充裕立即進發諭軍機大臣等前阿桂奏官兵自甲爾木山梁退回俟有續調兵到即行前進占據之語續據雲南湖廣督撫奏聞官兵入川日期阿桂處應有帶兵大員稟報何以今日摺內並未奏到又阿桂另摺奏稱綽斯甲布一路進兵更難稍緩但宋元俊染患時疫未能迅速進兵阿桂宜將應派之兵派員先行帶往並諭宋元俊在後繼進方屬妥協設或宋元俊病難速痊又尙須另籌接代之人不可因循姑待坐失事機且據金川脫出屯兵供詞索諾木將所有賊眾盡派助小金川支禦西南兩路則境內自必空虛此時若由綽斯甲布乘閒直入或將索諾木勦擒全局竟可不勞而定自是極好機會惜乎進兵稍遲不能先發制人耳至綽斯甲布之兵由革布什咱挑撥前往革布什咱甫經收服其地爲

章谷後路所有派駐之兵不宜過於抽撥今見調之昭通及湖廣兵六千名早入川境阿桂酌調數千選員帶赴綽斯甲布較之專調革布什咱之兵更爲得力阿桂當就在情形通盤籌酌務出萬全○乙未諭軍機大臣等前因金川賊酋悉力抵禦西南兩路料其境內空虛曾令阿桂派兵由綽斯甲布一路爲擣虛之計今據溫福奏訊沃克什脫出番人供詞索諾木惟恐綽斯甲布土司引導官兵進剿並稱該土司自行發兵攻打等語則綽斯甲布一路實爲有隙可乘著傳諭阿桂速撥兵四五千選派勇幹將領帶往並駕馭綽斯甲布土司作爲鄉導出其不意乘間進攻實爲事半功倍阿桂務須努力爲之○辛丑 上駐蹕避暑山莊○壬寅溫福等奏南北兩山賊卡於八月二十六日賊眾自行燒毀臣溫福卽從阿喀木雅前進壓至木蘭壩臣豐昇額亦從美美卡壓至

日喀爾橋嗣據哈國興海蘭察李煦等稟稱賊酋屢在瑪爾迪克卡外喊求願盡退沃克什地方當卽諭以僧格桑如果悔罪應將各卡全行撤退二十六日賊眾果將各卡柵毀撤該提督等隨壓至沃克什舊寨見賊聚守於路頂宗一帶山梁苟延殘喘臣等仍督兵進剿諭軍機大臣等溫福等正當攻圍之際忽見賊寨焚燒卽應乘機急擊痛殲醜類方足振威解恨乃竟聽賊自去自來而於已逃出卡之賊尙不能剿殺則駐兵在彼何爲至賊在瑪爾迪克山梁甫經哈國興等許降何以能同時將各卡盡行毀撤均不可解溫福此時惟當督兵併力進攻不可因此稍懈如賊酋以退地求饒之說向溫福等支飾卽當責以罪惡重大天兵申討不滅不休雖將原地退出不能稍爲寬宥若逆酋或向哈國興等別有求饒之說原可量其情形計誘智取又不妨隨機應變務出萬全

至我兵見已深入其瑪爾迪克喇布楚克等處皆係我兵後路賊番在在可通不可不防其抄襲溫福等當一體留心防護切不可稍涉大意至董天弼奏報於九月初一日從納雲達一路先攻取大板昭等處是董天弼見有奮進之勢溫福派翼長富瑚侍衛明仁彰嘉布參領額勒登布等往同協助自更爲得力○甲辰 上恭送 皇太后自避暑山莊回鑾○乙巳阿桂奏據駐綽斯甲布之副將李天佑稟稱該土司已選土兵二千並指引進兵之路一由日旁山攻勒烏圍上首一由俄坡攻勒烏圍中閒一由牧畜溝攻噶拉依但見在兵力不敷分撥應先酌要路進攻臣一面派將領帶兵前赴綽斯甲布一面飭遊擊馬應昭同李天佑駕馭該土司督兵前進諭軍機大臣等綽斯甲布土司盼望官兵速往自屬實情其分路多兵之說亦必應如此辦理見在昭通湖廣頭起官

兵陸續可抵成都著傳諭阿桂卽速酌調派員帶領前進李天佑
原以副將候補之員今見出有陝西挑峴協副將員缺卽令李天
佑補授馬應詔係候補遊擊著加恩以參將用伊等自當愈加感
奮但二人究屬偏裨於統領大兵不足以壯聲威舒常原係領隊
大臣曾經帶兵閱歷見在西路帶兵之人尙多卽令舒常迅速起
程趕赴綽斯甲布領兵進剿並諭阿桂令音濟圖烏爾圖納遜二
人陸續帶兵往綽斯甲布隨同舒常前進○丁未溫福等奏臣等
察看路頂宗山梁形勢於兩山中突起一峰三面距河石礪排列
險隘異常查北山美美卡下至日喀爾橋綠山有小路可登地名
兜烏近可抵康薩爾遠可抵明郭宗見派馬彪額森特帶兵五千
由此路進剿仍令李煦留駐貢噶以防策布丹後路並令牛天畀
由木蘭壩南山梁擎卡保護貢噶糧路總兵張大經帶兵駐阿喀

木雅副將成德駐色布色爾自資哩以東駐防官兵各仍其舊至董天弼駕馭三雜谷土司覓閒進兵並於所過之校磨卓克采等處官寨留兵彈壓諭軍機大臣等溫福等籌辦分路進剿及防後事宜所辦俱妥惟是路頂宗地險礪多官兵斷不可輕率攻撲止宜用大礮轟摧以綴賊勢而分路由兜烏及策布丹兩處覓閒進攻策布丹有哈國興海蘭察前往已能勝任其兜烏一路尤爲險要馬彪額森特二人恐不能籌辦裕如且僅有兵五千亦覺不敷豐昇額於北山路徑既熟心亦切實勇往著於路頂宗所有官兵內酌撥二三千名令豐昇額帶領迅卽馳往兜烏進剿○戊申

上自避暑山莊回鑾○癸丑諭定安親王永璜之子縣德著襲封定郡王和勤親王永璧之子縣倫著襲封和郡王○甲寅 上奉皇太后還京師○諭昨據周元理奏請明春巡幸津淀仰懇敬

奉 皇太后安輿周覽畿甸以洽 慈歡並請由趙北口登舟一路均係水程較爲安適等語朕俯循輿望恭請 懿旨仰蒙 慈諭欣悅允行明歲 皇太后自京啓鑾由黃新莊涿州至紫泉一

路於趙北口登舟所有應行豫備事宜各該衙門照例敬謹豫備

○丁巳禁各省自巡撫以下不得延請本省幕友及流寓帶有家屬在五百里內者並限定五年更換○己未諭向來旗下家奴有酗酒行兇者一經本主報明該旗卽行送部發遣其妻室有年老殘廢及不願隨帶者俱不同發定例未爲周密如近日秦璜卽有將發遣家奴之妻留占爲妾之事不可不另定章程以防流弊蓋家奴犯法其妻亦屬有罪之人自當一體發遣但此等犯罪旗奴妻室自不值官爲貨送若其中果有實在不能隨帶者或令於親屬依棲或聽本婦另嫁自不便仍留服役以杜嫌疑嗣後該部旗

遇有發遣家奴之案俱照此辦理著爲例○庚申阿桂奏小金川頭人薩斯嘉與通事拉旺並賊番等喊求投稟臣等譯看仍以沃克什呪伊父子報仇爲辭狂悖可恨訊據該番等供見收稞麥僅支兩三月糧且番眾七八千死亡過半自屬實情此時僧格桑雖將沃克什退還見西路兵尙無歇手之勢因復遣人來南路藉以窺探軍情如稍優容賊酋必更誑番人嗾使死守而巴旺布拉克底各土司或疑仍復納降轉多觀望因將薩斯嘉拉旺解京餘番解省絕其回諭以固眾心再探有前敵東山梁賊番卡棚靠山臨河占盡地勢惟西山腳壁立水中若得皮船百十夜中泝流可登見在趨造候滇兵全到一面從甲爾木衝壓一面乘夜渡河進攻報聞○是月安徽學政朱筠奏蒙恩簡任以來時以實學訓迪諸生亦蒸蒸向風第試卷中別字俗體觸目皆是江南且然何況小

省請敕下儒臣取十三經正文依許慎說文顧野王玉篇陸德明
釋文校定點畫擇翰林中之工書者以清漢二體書之摹勒上石
揭於國子監之壁昭示萬世得旨此奏雖是待朕緩緩細酌
冬十月甲子諭據魯贊元奏新科武進士挑授侍衛外其餘應揀
選營衛守備用者請照文進士之例一同帶領引見恭候分別錄
用等語所奏似屬近理但新科武進士朕御紫光閣親試騎射技
勇原係一體通行閱看即可定其等第無庸另派大臣揀選著兵
部卽於紫光閣校閱時將上屆分別營衛人數開單進呈候朕一
併酌量分記錄用並無庸重複帶領引見著爲令○戊辰晉封
皇六子貝勒永瑤爲質郡王○壬申諭據董天弼奏報於九月二
十四至二十八等日帶兵攻得穆陽岡及木了山梁等處克取石
卡三十餘座大卡木城三座殺賊百餘人等語董天弼等督率官

兵分路奮勇攻剿甚屬可嘉董天弼富瑚明仁佛遜沈寬及旗營各員並打仗官兵等均著溫福查明咨部議敘至遊擊沈寬自派赴黨壩以來頗爲奮勉出力並著溫福遇有參將缺出卽行奏請補授以示鼓勵○乙亥阿桂奏臣見派明亮領漢土兵八千餘由甲爾木山梁一路進攻其壘溝迤東泥壘一處派令總兵伊常阿領兵千名間道前往以綴賊勢至達烏大營留兵千餘臣親身督率由正面攻擊於十月初七日登山攻取各處碉卡得旨嘉獎○丙子賜李威光等五十人武進士及第出身有差○壬午諭據阿桂奏報於十月初四至初八等日分四路進攻將甲爾木山梁全行占據並前次未得之第四峰第五峰碉卡石城亦俱攻克殺死賊番百餘名並殺紅衣賊目三名搶獲木城一座碉卡二十餘座等語明亮等帶領官兵不避雨雪破卡殺賊甚屬奮勉所有此

次打仗之侍衛員弁兵丁等均著阿桂查明咨部議敘以示鼓勵
○以副都統華山爲領隊大臣往四川軍營○癸未諭朕閱三通
館進呈所纂嘉禮考內於遼金元各代冠服之制敘次殊未明晰
遼金元衣冠初未嘗不循其國俗後乃改用漢唐儀式其因革次
第原非出於一時卽如金代朝祭之服其先雖加文飾未至盡去
其舊至章宗乃槩爲更制自應詳考詮次以徵蔑棄舊典之由並
酌入案語俾後人知所鑒戒於輯書關鍵方爲有當若遼金元可
例推矣前因編訂皇朝禮器圖會親製序文以衣冠必不可輕言
改易及批通鑑輯覽又一一發明其義誠以衣冠爲一代昭度夏
收殷嘏本不相沿襲凡一朝所用原各自有法程所謂禮不忘其
本也自北魏始有易服之說至遼金元諸君浮慕好名一再世輒
改衣冠盡失其醇樸素風傳之未久國勢寢弱存及淪胥蓋變本

忘先而隱患中之覆轍具在甚可畏也況揆其所以議改者不過云袞冕備章文物足觀耳殊不知潤色彰身卽取其文亦何必僅沿其式如本朝所定朝祀之服山龍藻火燦然具列悉皆義本禮經更何通天絳紗之足云耶且祀莫尊於天祖禮莫隆於郊廟溯其昭格之本要在乎誠敬感通不在衣冠規製夫萬物本乎天人为本乎祖推原其義實天遠而祖近設使輕言改服卽已先忘祖宗將何以上祀天地經言仁人饗帝孝子饗親試問仁人孝子豈二人乎不能饗親顧能饗帝乎朕確然有見於此是以不憚諄復教戒俾後世子孫知所法守是創論實格論也所願奕葉子孫深維根本之計毋爲流言所惑永永恪遵朕訓庶幾不爲獲罪 祖宗之人方爲能享 上帝之主於以永縣國家億萬年無疆之景祚實有厚望焉其嘉禮考仍交館臣悉心確覈還金元改制時代先

後逐一臚載再加擬案語證明改繕進呈候朕鑒定昭示來許並將此申諭中外仍錄一通懸勒上書房○諭前因徐績奏報糧價單內各屬多註價昂當卽批諭今年山東旣獲豐收何以米價尙昂者多令其查明覆奏今據奏到該省所報糧價因乾隆三年前護撫黃叔琳奏准將貴賤昂平分爲等則歷來以次酌定照此填註等語所奏太屬拘泥徐績平日尙屬明曉吏治者何以不通達事體若此朕令各督撫按月奏報糧價原以米穀爲民食所關期於市糴貴賤時得周知若如該撫所辦尙以三年前定價爲率自是不過依樣套寫全不足憑矣於朕軫民依勤省歲之旨毫無裨益又妄用此虛文敷衍爲耶昨薩載奏江蘇省秋收實有十分而糧價單內又註有價貴字樣曾經傳旨詢問似亦係相沿成式恐各省類此者正多不可不明白宣諭米糧價值贏縮固視乎歲收

豐歉及閏歲既久生齒日繁則用物廣而需值日增乃係一定之理卽各省買補倉糧屢請增價可知矣方今海寓承平一百二十餘年戶口益滋每歲難以數計且不必以遠論自乾隆三年至今亦已三十餘年當時之所謂貴價卽係邇來所謂賤價黃童白叟當亦無不共知乃欲執三十年以前之等則爲三十年以後之奏報與膠柱刻舟之見何異況天下無不食米之人米價旣長凡物價夫工之類莫不準此遞加若固執前事亦能一槩比而同之乎夫厚生利用首以粒食爲先誠以民愈庶富愈難不得不於豐亨豫大之時切保泰持盈之敝所謂守成之難端在於是此非朕厭聞米價之貴蓋期奏報之實據各督撫莫錯會朕意嗣後當飭屬周咨市價率以三五年前後爲準覈實詳明列單具奏不得蹈襲積年陋習徒以刻板具文塞責著將此通行傳諭知之○以護軍

統領公興兆爲領隊大臣赴四川軍營○丁亥命桂林富興仍赴金川領隊進剿○己丑諭國史館進呈新纂明珠列傳內所列郭琇糾參各款臚採不全於覈實紀載之義未合明珠在康熙年間身爲大學士柄用有年乃竟不克自終漸至植黨營私市恩通賂勢燄熏灼物議沸騰 皇祖疊申誠諭期得以恩禮保全而明珠不知省改致爲郭琇參奏復念其於平定三藩時曾有贊理軍務微勞不卽暴示罪狀然亦立予罷斥並未嘗廢法姑容後雖量爲錄用僅授內大臣之職距其身歿二十餘年不復再加委任此實皇祖恩威並用權衡纖毫不爽迥非三代以後所可幾及而確覈明珠罪案止在徇利太深結交太廣不能恪守官箴要不至如明代之嚴嵩溫體仁輩竊弄威福竟敢陰排異己潛害忠良舉朝側目而莫可誰何也卽如明珠以見任閣臣而郭琇卽以露章臚

款抨擊甚力使明珠果能如明季諸奸之箝制言路則郭琇矢口之間早已禍不旋踵卽或深謀修隙亦必多方狙伺假手擠排乃郭琇因此一疏遂以鯁直受 知不及二年卽由僉都御史擢都御史不聞明珠之黨有能爲之抑沮者雖其閒亦曾因事論黜而我 皇祖鑒其政績風力由閒廢中擢爲湖廣總督後因紅苗搶奪隱匿不報削籍歸里其罪實由自致亦非明珠之黨藉事以爲報復今郭琇列傳具在可考而知也至於明珠生平是非功過原不相掩我 皇祖慎持予奪之柄至公至明因物付物恭繹

聖諭仁至義盡一一適如其人之所自取卽此可以窺見萬一茲館臣哀輯明珠事蹟因檢閣庫未獲郭琇劾章似由當日 留中不下遂據館中所存郭琇疏稟刊本撮載大凡但其閒刪削過多恐傳之既久或疑修史者有意曲爲隱諱於據事直書之旨無當

也因命於明珠傳中全列郭琇參本俾天下後世得喻此事本末共知我國家立綱陳紀朝宇肅清從無有宵小僉王如前代之得以怙權干政而我皇祖聖明英斷刑賞持平實爲執兩用中之極則朕稟承祖訓凡一切用人行政無不本此意爲折衷用是剖悉原委宣諭中外仍命錄載傳後使定論昭然永以示傳信而垂法戒焉○庚寅阿桂奏明亮進攻真登梅列賊番拒守四峰礮卡排列而最北一礮之下有山腳一路賊番築有二礮從僧格宗一帶運送口糧必經由其下繞至後面方可前進十月十二日令官兵向下連築卡座以斷賊番來路得旨此舉乃斷其後路最要策也○辛卯溫福豐昇額奏臣等酌抽南北兩山官兵併力攻路頂宗如此舉尙難得手卽合攻兜烏儻仍難攻克見查有別斯滿一路卽抽調各處兵前往分剿報聞

十一月癸巳諭軍機大臣等近據溫福等奏見在合兵攻路頂宗阿桂一路亦已占據要隘山峰董天弼又進剿大板昭是於小金川地方業經三面夾擊而汪騰龍等由革布什咱攻吉地舒常等由綽斯甲布攻俄坡索諾木必將助逆兵撤還自救西南兩路自當擣穴擒渠但恐僧格桑竄入金川索諾木豈肯立時擒獻惟須急剿金川並縛兩酋方能通完此局至僧格桑及索諾木兄弟就擒駢戮必當倣照前此辦理雜谷腦改土歸流之法安營駐兵盡成內地庶爲一勞永逸之計此雖係善後事宜溫福等不可不豫知此意但須密爲籌畫不可稍露端倪致番眾生心滋事○乙未諭據溫福等奏報十月二十二三等日攻克路頂宗及喀木色爾賊寨共攻破大小卡寨五十餘座碉房三百餘間殺死賊番數百名俘獲金川賊人九名奪得大礮三座及軍械火藥糧食甚多一

摺此次溫福豐昇額督率將士調度有方海蘭察哈國興額森特及在事攻剿之將佐弁兵士練等均各奮勉出力甚屬可嘉俱著交部查明分別議敘其將弁內實在奮勇出眾者不拘滿漢並著溫福等確查奏聞賞給巴圖魯號卽綠營兵丁內果有勇往超羣者亦著破格查賞以示鼓勵至海蘭察額森特帶兵甚爲奮勉海蘭察著交兵部遇有蒙古都統缺出卽行奏請補授其所遺副都統員缺卽令額森特補授所有溫福等奏摺並著譯漢發鈔○戊戌阿桂奏明亮帶兵進攻真登梅列所取山腳石礮旁有小山一座上有石卡明亮於十月十八日派兵於山溝左右潛伏復派官兵直攻小山石卡各處賊眾分路來援我兵佯退賊眾追至山溝伏兵並起退兵復還殺賊甚眾並殲大頭人二名前有兩峰相接處地名翁古爾壘賊番悉力拒守見令官兵略爲休息偵探道路

情形以期深入諭軍機大臣等明亮此次帶兵甚屬勇往計畫亦爲得當阿桂當傳諭令其益加努力以冀勉副酬勳至伊常阿由泥壘進兵何以尙無信息而阿桂在達烏亦未見有寸進卽以堅礪非可急取亦豈容過於遲疑坐待見在溫福等已將抵明郭宗阿桂若卽能克僧格宗則兩路夾擊可藏小金川之局著傳諭阿桂將見在進剿情形迅卽覈奏○己亥溫福豐昇額奏十月二十四至二十八等日官兵進攻兜烏山梁及附近賊寨哈國興額森特巴雅爾阿爾蘇納等攻取穆拉斯郭大寨占據兜烏山頂與馬彪合兵悉奪兜烏附近礪卡翹蘇勒帶兵從沃克什舊寨之北鼎達實諾爾山奪取礪卡海蘭察帶兵從色木僧格山前進至格實迪連奪礪卡進取木城見在據守要隘取路進攻明郭宗報聞○諭軍機大臣等溫福等奏瓦寺土舍索諾木雍中請將伊所賞名

號花翎移給伊叔土司索諾木旺丹等語索諾木旺丹感戴朕恩
因年邁不能從軍令索諾木雍中帶領所屬人等隨營效力殊屬
可嘉著加恩於見在職銜上加升一級並賞戴花翎給與名號以
示優獎其索諾木雍中見在軍營出力所有原給名號花翎無庸
移給○癸卯諭據文綬奏暫請開捐以裕軍需一摺所奏大非已
於摺內批飭矣捐貲入官本非選舉正格朕御極之初召見內外
臣工不但捐納出身之人卽科舉出身之人亦多有言捐納中可
得人材者因姑試廣求以期克當任使乃歷年來報捐人員雖不
乏尙堪驅策之人求其才識超羣體用兼備者竟未多觀卽今內
而部院大臣外而督撫其實能爲國家辦事者孰爲起自貲郎者
乎捐納事例一開必致正途滯積朕實深知其無益是以降旨永
行停止茲科目銓選甫得疏通豈可復使紛淆阻滯乎方今國家

當全盛之時左藏所儲日以充積乾隆初年戶部銀庫止三千三百萬而今已多至七千八百餘萬奚翅計倍而贏然此並非有加派重徵之事因平定西陲以來摘減沿邊防守兵馬及酌裁各省駐防漢軍糧餉馬乾等項除抵補新疆經費外每年節省銀九十餘萬兩歷今十有餘載歲需出數較少約積存千有餘萬庫帑之增大率因此憶乾隆二十年以前內務府存備之項或因支給不敷奏撥部帑數十萬協用者有之今亦以歲會溢於舊額尙將內務府餘銀撥貯部庫朕雖不詡儉而府藏充盈實爲從來所罕有也每念天地生財止有此數不在上卽在下與其聚諸無用之地曷若使民間多得流通所以遇有災荒賑恤曾不惜大費帑金又兩次普蠲天下正賦俾得藏富於民方思乘此邦計裕饒因公多爲動用以益閭閻樂利之庥豈可轉復爲掊益之說耶至進剿

兩金川一事本屬勢不得已因僧格桑索諾木二酋俱係內地土
司敢於狼狽爲奸阻兵抗命侵擾鄰封若不厚集兵力堵穴殲渠
日久必貽後患不可不爲一勞永逸之計用以靖邊徼而輯諸蠻
其一切軍興待備所需雖多費實無稍靳今節次撥帑濟用一千
四百萬兩而太府之儲未嘗少減且兩路大兵深入小金川自可
迅奏捷音卽將來攻剿金川或略延時日再費二千萬兩亦可蔑
事庫貯尙在五千萬以上又何虞見絀文綬顧欲藉軍需之名孽
孽言利將已停指例復開乎至所奏請照從前金川之例每米一
石定價二十五兩等語明係欲爲地方官豫開浮冒之端此更不
可爲訓外省開捐包攬折收諸弊無所底止卽使實報實收而上
司下屬亦皆資其餘潤川省各員辦理軍需種種未協方負罪之
不暇又何必復曲爲體恤耶朕以文綬辦事實心特調任四川總

督冀其襄理軍務於事有益今乃率爲此奏初不意其識見淺狹罔識大體竟至於此文綬著交部議處仍將此通諭中外知之○丙午溫福豐昇額奏十一月初四日夜額森特由穆拉斯郭山繞至博爾根山頂占據大寨哈國興由喀木色爾北山旁進奪額爾奔山柵海蘭察自山後進奪賊卡復奪取瑪覺烏大寨此處甚關緊要見已添兵駐守諭軍機大臣等溫福等此次進兵分隊占據博爾根山並攻克瑪覺烏寨落取路前進甚合機宜但細閱地圖簇拉角克納拉覺等處賊碉林立與我兵後路相通者甚多溫福等宜善爲防範其進兵則仍應照攻取路頂宗等處籌辦分路方爲有益○丁未諭朕御極以來夙夜孜孜惟以敬天報本爲念每居郊壇大祀必躬親昭事用展悃誠三十七年於茲未敢稍懈向來謁壇行禮日由降輦進至拜位以迄薦獻禮成中間履

蹈升降儀節最爲繁重朕惟虔恪以臨無有愆忽今自念春秋已
越六旬其於動容周旋差不能及前此之從容中節幸朕躬康疆
如昔仍得祗循儀度經久不渝第思敬意所持貴乎內外交養若
精力過勞恐心志轉未能純一與其拘於行走末節弗克致其寅
恭且或因此而憚於親詣何如酌損步陟繁文得專於升馨告備
時肅將劼愆更足以嚴對越而抒誠悃乎自古履帝位而臻壽考
者載籍會不多觀我朝景運遐昌化成熙洽上荷 昊蒼鴻眷

列祖貽庥朕周甲已逾勵勤未怠真可謂國家祥瑞之大者茲特
降此旨非敢自惜其勞惟其要之於久從此更增年歲當永矢此
昭格之誠我世世子孫承庥衍慶即可奉此爲法守且知朕六十
歲以前不憚經曲之繁六十歲以後冀申專壹之敬初無二致也
所有升級次數及降輦步行之遠近無關大體諸儀節應如何酌

定合宜之處著大學士會同各該衙門敬謹詳悉妥議具奏○戊申諭據阿桂奏稱本月初三日督率將弁黑夜渡河分路攀援據山頂及各處要隘攻破東面之翁古爾壘西面之布拉克尼德古及紐寨各地方計奪得大木城一座碉寨一百餘間石卡五十餘處殺賊二百餘名生擒活口一名並獲軍械口糧各物等語此次阿桂實心籌畫調度有方甚屬可嘉阿桂及在事出力之將領弁兵並著查明交部議敘至攻取大木城時有貴州千總郭士才首先拔開木柵騰身躍入以致陣亡實堪憫惜著加恩贈都司銜交部照例議卹仍著賞銀一百兩給付其家並著阿桂查明郭士才有無子嗣如年已及歲卽送部帶領引見○諭昨原任川東道託隆回京詢以阿爾泰在任行事據將其贓蹟各款逐一開出因令軍機大臣詢問阿爾泰之子明德布據供阿爾泰派屬員代買物

件有少發價值之事又前任龍安府知府馬權保舉卓異曾有送給松石朝珠及皮張各件等語是阿爾泰婪索情節已屬確鑿無疑不可不徹底根究業經諭令文綬併案嚴審矣馬權見於陝西道員任內緣事降調離任卽著革職令該撫巴延三派員押解來京交軍機大臣等訊問至李本身任藩司軍需局事務是其專責乃於辦理夫糧及運送火藥等事種種貽誤且於所派辦差正印各官不卽委員署理至誤地方公事其罪愆已不爲少念其尙屬公過是以屢經傳旨申飭仍予姑容冀其或思儆戒改悔今訊出阿爾泰在任聲名狼藉若此豈託隆遠在川東尙能縷析指陳李本與之同城共事最久轉漫無見聞之理李本係藩司大員何竟聽其恣意貪婪不早據實陳奏似此徇情容隱其居心實不可問難以復加寬貸李本著革職交與文綬一併嚴審確情定擬具奏

四川布政使員缺著錢鑒補授其陝西按察使員缺著劉墉補授
○庚戌諭皇子原與外間王公有間一切服用悉如親王見在皇
子中四阿哥六阿哥俱封郡王其俸銀及護衛官員自應視其爵
秩而一應服用仍應照皇子之例俟朕八旬開六歸政時再各按
爵秩方爲允協○壬子溫福豐昇額奏臣等於十一月初六日黎
明督令哈國興帶兵攻達克蘇山巔大礮其時普爾普等領兵奪
據山巔向下賊礮以斷賊人來路海蘭察等領兵上攻達克蘇山
復令章京觀音保帶兵由山下小路進奪賊礮與海蘭察兵上下
合擊將此山礮卡以次奪據其山巔大礮雖未攻克見令哈國興
等留兵紮營以綴賊勢臣等統領大軍由達克蘇山腳進攻明郭
宗諭軍機大臣等溫福等奏攻取達克蘇山賊寨礮卡所辦自合
機宜但高峰礮內賊人尙有牽綴之兵南山三道大溝仍有通我

兵背後之路益當留心防守再擒獲賊番所稱番眾心變亦勢所必然如果將僧格桑擒獻卽應亟予獎勵加恩撫其餘眾則辦理小金川之局便可完結並可令金川賊番聞之心動更有裨益至海蘭察哈國興及侍衛章京等節次進攻均屬奮勉俟攻克明郭宗之日一併議敘○癸丑諭奉 皇太后懿旨向來每遇慶典令節 皇帝詣 慈甯宮朝賀至永康左門外卽降輿步入今 皇帝春秋已逾六旬雖體氣強健精力如常而禮數過勞之處亦宜隨事撙節嗣後遇元旦行禮在 慈甯門東階下降輿 萬壽行禮在 慈甯門西階下降輿並就門旁著內監設便座以資小憩以示憊憊愛護之意欽此朕欽承 慈命敢不祇遵著傳諭各該衙門載入儀注敬謹遵照○諭據阿桂奏官兵續攻西山梁連克得里日寨扎覺木等處碉卡甚多伊常阿並於初六日四更督兵

潛上岳魯山梁將卡柵全行奪得其甲爾木一帶明亮等亦於初六日督兵進攻更餘尙未能克明亮等以賊人抵禦疲乏且料我兵必不連夜進攻正可乘其不備因分隊派兵於三更後潛往直攻真登梅列高峰同時奮力撲上賊人不能相顧各自棄礮驚潰共得礮卡三十餘處平石房五十餘處德赫布等亦於初六日早攻得格魯克古山頂大小卡十餘座並殺斃賊人奪獲槍械等語阿桂此次分兵越險攻奪賊礮甚眾董率有方明亮伊常阿德赫布倍著奮勉在事將弁兵練亦甚出力深爲嘉悅均著交部查明議敘再明亮德赫布已另旨各賞副都統銜所有伊常阿總兵任內降級留任之案並著加恩開復守備崔文傑等均屬奮勇出力崔文傑業照阿桂所請准其升補都司其守備馬廷亮范玉光並著量加一等升用以示鼓勵阿桂摺並發西山梁甲爾木及正地

山口各處打仗官兵間有傷亡者並著阿桂覈實報部照例議卹
○大學士禮部等衙門議奏 大祀禮儀期於斟酌適中今遵旨
敬謹詳議凡 郊祀前一日 皇上莅齋宮乘輦入 西天門由
齋宮南御禮轎至 神道西降輿步入琉璃左門詣 皇穹宇上
香禮成出至降輿處升輿還齋宮閱視 壇位卽令原遣視牲之
親王恭代行禮祀之日 皇上自齋宮乘輦至 神道西階下幄
次相對處降輦升階由 櫺星左門步入行禮時 皇上初升至
二成拜位立贊引奏升 壇 皇上升階上香畢還至二成拜位
行迎 神禮典儀官唱奠玉帛 皇上升階行奠玉帛禮還就讀
祝位立以次進俎三獻及飲福受胙禮成仍還至二成拜位行謝
福胙及送 神禮畢出至降輿處升輿還宮祀 方澤日行禮
亦如之凡 祈穀前一日 皇上莅齋宮乘輦入 西天門於齋

宮東御禮轎至西甌城左門間降輿步入琉璃左門詣 皇乾殿

上香禮成出至降輿處升輿還齋宮祀之日有司先設幄次於

祈年門東間 皇上自齋宮乘輦至東北角道適中處御禮轎由

新設門入至南甌城門外 神道西階上降輿由甌城左門步入

就幄次自 祈年左門入行禮禮成出至降輿處升輿還宮凡歲

暮杳祭 太廟日 皇上乘輦由闕左門入西北門至 太廟北

門外御禮轎入左門循東牆行至戟門外東階下降輿步入左門

升階進 殿親詣 肇祖原皇帝位前上香派皇子親王分詣

列祖 列宗位前同時上香畢行禮如常儀禮成出至降輿處升

輿還宮祭 社稷壇日有司先設幄次於拜殿內 皇上乘輦由

闕右門入東北門至 社稷壇北門外御禮轎入左門循戟殿東

行至拜殿東階下降輿升階詣 壇行禮如常儀禮成出至降輿

處升輿還宮祀 先農壇日 皇上御禮轎自外北天門入內北
天門循 太歲殿後轉至 壇東北隅降輿詣 壇行禮禮成出
至降輿處升輿詣 太歲殿上香如常儀從之○甲寅諭軍機大
臣等何焮奏覆購訪遺書一摺並將購得書籍目錄開單進呈朕
披閱之下因憶籍隸該省之原任侍郎胡煦平素究心理學曾有
著述朕所深知今單內並不見其姓名則此外之似此遺漏者當
復不少著傳諭何焮令其再悉心蒐採並飭屬實力奉行不得以
書籍無關政要一任草率塞責俟續有購得卽行彙單具奏○丁
巳阿桂奏臣於本月十三日派侍衛三寶等進至西山之邦甲山
梁章京圖欽保等沿溝而上從邦甲山頂繞出賊後合兵攻擊奪
取邦甲山梁石城大礮及各石卡遊擊谷生炎沿河進攻策爾丹
色木之喇嘛寺已克邦甲之兵向下夾攻賊眾潰逃官兵追殺頭

人一名奪取喇嘛寺復進取公喀爾將山頂後碉房一併攻取臣已令明正土兵豫備皮船派守備鄂輝領兵渡河攻取東山梁下拉宗等寨及溝內坡上各碉房又進至拉約焚燒七寨番人盡降翁古爾壘高峰上賊人亦遁統計東西兩面山梁攻克碉寨三百餘間土守備阿忠保又攻取西山梁後之登藏寨東山梁官兵復與明正土兵督率拉約降人攻至宅壘焚燒寨落番人亦皆投順此二寨共降番民二百餘戶精壯番丁二百餘人查僧格宗一帶爲小金川西南門戶田地稍饒戶口最多碉寨亦密今番人接踵乞降臣遵奉諭旨投降者盡予撫輯拒守者卽加駢戮番人已盡解體但番情詭譎未可深信見在拉約宅壘兩處精壯番丁令各土兵分帶隨營以便防制其餘番戶派明正等處土兵看守至西山梁後處處與金川接壤已派兵分布防範並拆毀攻得碉寨俾

賊不得乘閒占踞諭據阿桂奏報攻克東西山梁之邦甲拉宗等十數處所得石城大卡碉房數百座剿殺賊番多人餘各跪懇投降其分兵攻克之宅壘番人亦復哀求投順並收獲糧石牛羊甚多等語覽奏深爲嘉悅阿桂連日屢報克捷今又攻得邦甲拉宗等處在事官兵俱奮勇直前所向無阻實屬可嘉皆由阿桂董率有方故能疊著勞績均著交部議敘其打仗受傷弁兵及陣亡之土司頭目等並著查明咨部照例賞卹○起伍岱爲藍翎侍衛赴四川軍營○己未諭據溫福等奏於本月十五日派撥官兵分路進攻將附近明郭宗一帶之山溝及沿路所有番賊碉卡共九十餘座盡行攻得殺賊甚多擒拏番賊十一名所得軍器火藥牛羊糧食等件無算見在乘勝用大礮轟摧明郭宗等語此次官兵俱能奮勇出力所向無前皆由溫福等董率有方於分攻合剿機宜

無不諳練是以隨宜運用迅速奏功甚屬可嘉均著交部議敘其有打仗陣亡受傷兵練並著查明咨部照例卹賞

十二月辛酉朔禮部議准奉天府府丞吳綬紹奏奉天府文廟丁祭時猶沿用民間鼓樂請頒發太學樂舞器具圖依式製造並由奉天府選伶生數人咨送太常寺肄習俾得轉相傳授以備聲容從之○壬戌諭據軍機大臣等本日據文綬奏稱覆訊阿爾泰各款定擬一摺前已傳諭富勒渾令其迅速馳驛赴川秉公審辦見在案內尙有應行詰問各款當詳細窮究俾無遁情未便仍照文綬所奏覆訊之摺仍行籠統其辭但圖就案完案轉不足以服阿爾泰之心著將文綬摺卽行鈔寄富勒渾令將應詰之款逐層研審訊取確供一併定擬具奏○癸亥諭據阿桂奏十一月十七日派撥將弁官兵分路進攻都恭山坡礮卡十餘處殺賊二三十

名追戮奔竄之賊五六十名十八日將日本則扎爾瑪等處一帶
碉寨及拉咱寨丹扎噶察丹嘉等處碉卡盡行攻克又分兵順河
進取東山一面之茨寨榮寨殺賊百餘名前後共收獲降番六百
餘口攻克碉寨七百餘間占據山梁三道十九日亥刻用皮船渡
河分爲兩路潛至僧格宗碉房一面攻壓一面繞截賊人去路賊
人於寨後拆牆逃潰官兵追殺二十餘名帶傷逃竄者甚眾攻得
大戰碉一座平房小碉一百五十餘間奪取槍礮刀矛火藥鉛子
牛羊糧食甚多等語僧格宗距美諾不遠爲小金川險要門戶賊
人負隅拒守甚堅阿桂能殫心籌畫調度有方將士等均各奮勇
爭先連日攻奪各處要隘碉寨殲戮多人賊番喪膽所至降潰復
乘其不備黑夜分路潛師襲擊僧格宗賊棄險驚逃乘勝克捷深
合機宜朕心深爲嘉悅阿桂及在事將弁兵練並著交部從優議

敘以示獎勵○諭明正土司甲勒參得沁帶領所屬人等奮勉出力著加恩賞戴花翎並賞給佳木拜屯名號以示獎勵○諭軍機大臣等僧格宗係賊巢門戶地勢極爲陡險今我兵於黑夜分道架入毀碉殲賊從此直擣美諾小金川之事自當剋日告蒞皆由阿桂籌畫調度悉合機宜是以陷銳摧堅要塞應手而得著賞御用黑狐冠以示獎異所有應行優敘之將弁兵練阿桂可查明功績等次咨明辦理其所奏進取僧格宗時巴旺布拉克底頭人雍忠爾結等與我軍定議前進頗見誠心效力並交阿桂酌加賞賚○阿桂奏南路由章谷起東面山後卽係小金川汗牛地方計長百數十里皆與賊界相近必須留兵防守翁古爾壟至僧格宗六十餘里其中納圍納扎木等處係金川大路防守亦屬緊要見在南路進攻之兵不過數千因酌撤達烏等處守兵並無關要隘地

方之兵添爲勦擊之用至綽斯甲布革布什咱兩路之兵原爲牽制金川賊勢今旣攻克僧格宗正進攻美諾之時舒常奏請添兵不能不俟小金川事竣再籌畫合勦金川諭軍機大臣等西南兩路官軍深入正值需兵緊要之時斷難分此要路之兵而攻不能入之地朕屢經降旨令舒常相機辦理今阿桂奏到情節均與朕旨符合不但見在形勢如此卽擒獲僧格桑後接辦金川亦止須溫福一路阿桂一路豐昇額一路舒常則令其助豐昇額進兵足矣著傳諭阿桂善爲籌畫速抵美諾縛取逆酋舒常但以分賊兵勢爲要著切勿冒險輕進致有損傷再此次官兵攻取僧格宗拉布東阿李植善尤爲出眾應否升級賞給巴圖魯號著阿桂查明具奏其餘各員並著一體查奏○乙丑溫福豐昇額奏明郭宗北有甯扎山西南有公雅山賊於兩山對峙處築礮拒守臣等於十

一月二十一日令海蘭察哈國興額森特帶兵襲擊公雅山進至山頂占據卡座見進攻明郭宗報聞○庚午諭于敏中之妾張氏於例原不應封但于敏中見無正室張氏本係伊家得力之人且其所生次女已適衍聖公孔昭煥長子孔憲培係應承襲公爵之人將來伊女亦可並受榮封張氏著加恩賞給三品淑人○阿桂奏千總劉世勳等督兵攻取卓克寨明亮等分兵三路進攻古嚕賊番分爲兩路下山衝突官兵先將中路賊番擊敗逃回死守其右山梁之賊欲圍官兵所占石卡都司許世亨督兵奮力迎擊短接七八次又派陝兵二百餘名前往夾擊賊始潰逃遂將古嚕地方攻克又章京拉布東阿守備李植善收服鳩寨瑪爾里寨番民八十餘戶日吉嚕寨番民四十餘戶明亮收復僧木則等寨番民百四十餘口其布隆喀咱他克撒瑪爾里木巴里各碉寨亦均陸

續來投查自策爾丹色木至僧格宗其中如噶察等處山崖峻削
偏橋皆爲賊番焚毀見修理以利饋運其由達烏至僧格宗據侍
郎劉秉恬察看應設糧臺二處亦經派員撥夫安設見在西山梁
一帶惟納圍納扎木二處尙有遺孽其地在僧格宗西北若俟盡
數埽除恐延時日自應徑擣腹心迅攻美諾惟是西面山梁攻得
各處均須留兵分駐見派副都統書景阿駐翁古爾壘總兵英泰
駐僧格宗其納木覺爾宗溝口係通納圍納扎木大路令總兵伊
常阿駐禁僧木則一帶尤爲緊要派章京備弁等分防各隘口並
令副都統永平統領駐守各處分布之餘所存漢土官兵共七千
名臣親督前進諭軍機大臣等阿桂督率官兵不日攻取賊巢克
建大勛自有酬庸之典此時且不必交部議敘惟此次打仗官兵
有出色效力者著卽查明咨部分別議敘都司許世亨千總劉世

勳奮勉出眾均著賞給巴圖魯號許世亨遇有參將缺出卽行奏補其另摺所奏雍忠爾結色爾奔並著賞給巴圖魯號仍加守備職銜賞戴花翎以示優獎見在南路已破僧格宗乘勢直抵美諾查閱番人供詞有僧格桑到布朗郭宗今又回美諾之語逆酋當此軍威偪近豈肯安坐受縛蓋由平日禁錮其父甚且悖叛跳梁罪惡貫盈天奪其魄致令林守美諾官兵得擣穴擒渠第該番所供有美諾若破卽退守帛噶爾角克再退守底木達我兵尤當設法遮防偵其所向躡迹窮追務擒僧格桑以完小金川之局方可接辦金川若徒得美諾空寨則小金川一役亦未可云告蒧也再如除夕元旦等佳節人情於此時必稍疏懈恐賊番窺揣及此潛向官兵劫營滋事不可不慎重周防令狡計無從施展我兵於此等日尤當乘其不備相機剿戮自更易於奏功著傳諭兩路大營

加意辦理○辛未溫福豐昇額奏公雅山之前有木爾古魯嘉巴日果爾烏谷三山下有大溝一道踰溝前進亦可直抵美諾臣等於十一月二十八日子刻分路進兵至大明時哈國興海蘭察額森特等兵至木爾古魯山腳奪取溝內賊寨及各卡座並將嘉巴占據派兵駐守又奏臣籌畫攻打明郭宗若由南山進攻隔山溝三道驛難越過其北山無可通之路若一面從達克蘇山梁壓下渡河於南岸正路分兵數隊使賊不能相救方可攻取當令海蘭察牛天昇等領兵二千自北山壓下搭橋渡河直由南山之布喇克占得固循梁壓取明郭宗臣溫福同海祿等前往接應又令額森特等領兵一千自北山下渡河由納拉覺仰攻又令總兵馬彪等帶兵一千前往南山自格賓迪壓下臣豐昇額同普爾普等前往接應並令哈國興等領兵一千渡河自南山中間鄂爾濟仰攻

將賊眾截斷併力攻取各路俱於十五日進兵海蘭察等潛至河岸趕搭橋座渡河卽登南山攻取布喇克扎喀爾二寨殺賊甚多牛天昇等自達克蘇山梁壓下占據明郭宗橋直取得木達奪獲礮寨三石卡七有賊二百餘出溝抵禦官兵擊退其殺傷及落水淹斃者更眾臣溫福帶兵前往會合自明郭宗東邊壓下攻打其額森特等所領兵夜半渡河至南山納拉覺地方向上仰攻克取賊礮十二卡十五臣豐昇額前往合攻並分兵往勦格實迪時馬彪等所領兵已從格實迪上面壓下兩路奮攻賊俱棄礮逃竄至哈國興亦自南山鄂爾濟直上奪獲賊寨四卡五查明郭宗礮房堅大拒守賊人甚多必先用大礮力轟一有摧陷方能攻取諭軍機大臣等溫福等奏附近明郭宗賊番礮卡俱行攻克見在進取等語溫福等此次分路派兵使賊不能防備救援克礮殺賊直抵

明郭宗用礮摧攻所辦皆合機宜至伊等擒獲番人所稱僧格桑在布朗郭宗念經同老土司商議之語看來賊勢窮促窘迫必由彼逃往金川大兵一抵美諾若卽獲僧格桑固爲美事卽或僧格桑遁去而小金川已被大兵占據從此直搗金川不惟僧格桑在所必俘卽索諾木亦將焉往著傳諭溫福豐昇額等惟有速蕩小金川巢穴占據地方加意相機辦理此時當已克明郭宗往攻美諾得有捷音卽行速奏○癸酉諭見在據阿桂奏報官兵已攻克僧格宗可以直搗美諾而溫福一路亦直抵明郭宗逼近賊巢路僅十餘里西南兩路音信已通自此合兵會剿小金川之局歲內卽可告蕲至金川索諾木助惡主謀罪更浮於僧格桑卽應移師併剿殲此渠魁庶杜邊夷後患理勢斷難中止屢降諭旨甚明此時兵力糗糧一切儲備師行聲勢更大應分三路進發用壯軍威

而西路所帶副將軍一印尙於軍營體制未符溫福著卽授爲定邊將軍阿桂豐昇額俱著授爲副將軍各行統轄弁兵分路進剿其溫福一路著舒常爲參贊大臣阿桂一路著海蘭察爲參贊大臣哈國興雖係綠營漢員但見係提督於軍營領兵征剿之事曾經練習且原在乾清門侍衛上行走與滿洲大臣無異所有豐昇額一路卽著哈國興爲參贊大臣一俟平定小金川之後卽相機分道進剿金川以期迅奏膚功懋氛永靖其將軍及副將軍印信著派侍郎副都統福康安馳驛齎送前往卽留軍營爲領隊大臣○諭和斯甲布土司工噶諾爾布此次進兵以來誠心奮勉毫無瞻顧甚可嘉尙著加恩賞給段六匹仍給尊追歸丹名號以示獎勵天朝用兵討賊擄穴擒酋運無中止今僧格桑索諾木擾害各土司其罪甚重若一日不滅谷土司一日不安此番剿賊正使各

土司永遠安生著將此意曉諭工噶諾爾布俾知感戴竭力一心以期埽殄逆賊永受天朝有加無已之恩○諭溫福一路派福興常保住巴朗額森特阿爾蘇納爲領隊大臣德爾森保賡音素普爾普巴雅爾爲領隊侍衛阿桂一路派興兆奎林齊哩克齊明亮華山書景阿音吉圖爲領隊大臣三寶蒙固勒和隆武烏爾圖納遜爲領隊侍衛豐昇額一路派董天弼福康安百靈阿永平伊常阿德赫布爲領隊大臣彰霽阿爾都明仁爲領隊侍衛其餘提鎮侍衛章京等著溫福等公議分領若止分兩路進兵其豐昇額隊內人員著歸溫福一路行走○丙子諭據溫福等奏十二月初五日分兵四路乘賊不備攻取明郭宗普爾普等帶兵奮勇先登克其碉卡殺死賊番甚眾惟西南賊寨有念經樓一座內有紅衣賊目抵死守拒我兵復攻圍斷賊去路並堆聚木柴火藥焚燒賊樓

將賊目及守礮賊番俱行焚死此次共殺賊三四百人擒獲活口二十七名奪取牛羊馬騾糧食軍械火藥無算見在整兵直擣美諾賊巢等語溫福等屢經攻得木爾古魯及公雅等處山梁前經降旨俟攻取明郭宗後再行議敘今溫福等督兵進剿調度有方將賊人緊要門戶既行克獲且殲賊甚多賊皆膽落從此乘勝直擣美諾自可迅奏膚功溫福豐昇額俱交部從優議敘其餘在事將領滿漢土練官兵亦俱奮勇出力並著溫福等查明咨部從優議敘其間有陣亡受傷之兵練亦著咨部賞卹再瓦寺土司都司職銜噶實布隨官兵一體奮勉效瘁行間今聞其臨陣捐軀情殊可憫昨曾諭部議定土司加恩之例所有噶實布應得卹典卽著照新例行○丁丑諭原任刑部侍郎錢維城學問素裕材具亦優侍直內廷勤勞夙著今春以父憂回籍因宿疾未痊遽聞溘逝深

爲軫惜著施恩加贈尙書應得卹典仍著該部察例具奏尋予祭
葬諡文敏○諭據阿桂奏十二月初三四等日派兵攻克池木初
五日抵美諾明亮德赫布等分路撲剿將美都喇嘛寺賊人殲戮
甚多遂進偏賊寨官兵三面合擊於初六日寅時將美諾礮寨全
行攻取並孳獲喇嘛及男婦等三十四名是日辰刻溫福豐昇額
亦卽會合見在迅速督兵籌辦追擒逆酋等語覽奏深爲嘉悅阿
桂統率官兵由達烏踰險進攻邇日連奏克捷一月之間卽直搗
美諾雖僧格桑暫行鼠竄不過在布朗郭宗等處勢如釜底游魂
不日卽可就獲而賊巢已破我武維揚阿桂調度有方懋著勞績
著交部從優議敘所有在事出力將弁兵練等並著阿桂查明咨
部一併從優議敘○庚辰阿桂奏美諾以西之彭魯爾八寨番人
已就招撫附近明郭宗之達伊達克蘇噶沙里尼雅布角等寨並

別斯滿五寨中之兩寨悉已撫定此路軍糧經侍郎劉秉恬前來
美諾趕辦足敷支給臣酌留官兵駐防各要隘卽於十一日起程
前赴布朗郭宗查溫福豐昇額兩路並進所帶兵數相仿而豐昇
額一路與金川隘口相通必須官兵續進更足以壯軍威臣卽由
豐昇額一路續進再小金川所屬地方汗牛最大形勢險絕臣令
明正土司甲勒參得沁設法招撫今據報汗牛等十四寨均經投
順臣卽令甲勒參得沁派出頭人暫爲管束諭軍機大臣等阿桂
奏籌辦美諾事畢卽於十一日起程前赴布朗郭宗所辦甚是與
昨溫福所奏卽由美諾前進追捕逆豎其遲速前後俱合機宜至
所奏撫定彭魯爾等寨極爲妥協汗牛一帶業遣明正土司招撫
更足慰懷該土司甲勒參得沁卽著阿桂傳旨嘉獎俾其益知鼓
勵惟據圖內地形別斯滿賊寨均在美美卡之北爲西路應防後

路其距美諾較遠因何得以並爲撫定或係舊圖方向未確著阿桂補繪呈覽又所奏豐昇額一路必須官兵續進是以從達巴溝分路帶兵繼進一節所辦亦是再溫福等昨奏於達巴溝山梁派員駐守因其地關繫緊要會諭阿桂添派多兵並令選派領隊大臣前往今阿桂旣由達巴溝分路進兵則此一帶形勢皆由目擊尤應善爲籌辦以期於事有益至金川賊眾焚礮而遁自必退守巢穴官兵旣掃清美諾卽日可勦金川如噶拉依勒烏圖等處雖向稱險隘諒亦與西路之路頂宗至明郭宗南路之翁古爾壘至僧格宗形勢相仿溫福等惟當堅持定見勦平金川擒縛索諾木方爲盡善○辛巳溫福豐昇額奏臣等於本月初十日帶兵至岱多喇嘛寺有喇嘛一名出降據云寺內僧格桑派有金川人二百僧眾請爲內應當令還寺仍督兵急攻寺僧皆出內外合攻殲賊

甚多遂進至布朗郭宗此寨周圍五六里礮房千餘間我兵分據要隘進攻自未至戌寨內火起賊番潰圍而出我兵奮擊殲戮據活口供稱僧格桑昨日至布朗郭宗即將伊妻妾及心腹頭人等由寨後美卧溝送至金川今早聞官兵已過帛噶爾角克礮即到底木達求見澤旺澤旺閉門不合進見遂從底木達過河亦由美卧溝小路逃往金川等語臣等旋由布朗郭宗過河至底木達各路兵續到次日進圍官寨澤旺出寨乞降當派哈國興看守侯部署稍定卽派妥員解京又別斯滿土舍安都爾及通事虎兒並跟役七名到營請降見在逐一嚴訊辦理再投降頭人阿克里願差人招降大板昭頭人末利阿什咱等隨派沃克什通事賡噶與阿克里所派之人同往並令董天弼來底木達會合至僧格桑所走美卧溝據番人稱路甚險仄僅容單身行走且沿途少水兵行不

便查功噶爾拉係乾隆十三年進剿金川之路布朗郭宗迪西簇
拉角克溝有路可通功噶爾拉不須繞回美諾見在籌辦口糧俟
董天弼兵到卽由此路前進再小金川全境蕩平必須清查戶口
察其地理形勢以爲辦理善後之地董天弼在川年久熟悉番情
見令帶兵一千駐紮布朗郭宗其查辦戶口冊籍須文員協助革
職松茂道查禮承辦邊務向稱幹練已咨明文綬飛調至營俾協
同董天弼逐處細查註冊俟剿平金川後通籌全局辦理諭據溫
福奏大兵由帛噶爾角克碉追剿僧格桑於十一日攻得布朗郭
宗僧格桑已於前一日潛竄金川隨卽進克底木達擒獲土司澤
旺解京其別斯滿土舍亦已來降大板昭一路已遣人往諭卽可
傳檄而定見籌合力追擊逆豎併剿金川等語前據阿桂攻克美
諾賊豎喪膽奔逃溫福等卽督兵迅速窮追蕩平巢窟見在僧格

桑雖尙在喙走偷生而伊父澤旺及其頭人通事等咸已就縛其別斯滿等處並經降順而大板昭一路亦已前往檄諭便可望風就撫小金川地方全行底定朕心深爲嘉悅溫福豐昇額督勵將士機宜允協均著交部從優議敘所有在事出力之將弁兵練等並著溫福查明咨部一併從優議敘○壬午諭軍機大臣等據文綬查奏前任藩司劉益任內起出庫吏草冊內開乾隆三十六年三月阿總督四月分養廉內扣存辦柁木備用銀三百兩下註五月初六日送院四五月每月並皆扣銀三百兩註明送院月日至七月扣八月分養廉銀三百兩註明先爲墊送各字樣又採木夫工銀米先於司庫借動復於通省官員養廉內攤扣彌補等語阿爾泰採辦柁木前經面奏每年自扣養廉三千兩委員購運朕以其扣數無多且出於本意又不累及官民遂允所請乃竟虛開

扣存之數仍暗行收回並且派官提商種種弊混實出情理之外已傳諭富勒渾嚴行查審併案定擬矣至劉益不過小有才具其家風本屬平常前因阿爾泰在朕前極口保薦是以擢用藩司在川年久乃其私繳阿爾泰扣存養廉一事敢於串通欺飾甚至將採木夫工銀兩私那庫項攤派屬員歷年俱係劉益一手經營逢迎滋弊殊屬不法劉益見已告病回籍著傳諭高晉卽將劉益革職拏問卽速派委妥幹員弁解赴川省交與富勒渾一併嚴審定擬具奏並飭委員沿途小心防範勿致疏虞所有劉益家產貲財並著高晉嚴行查抄毋得稍任其隱匿寄頓著將此由六百里傳諭高晉知之○癸未實授薩載江蘇巡撫○丙戌召塘古泰來京以瓦爾達爲盛京戶部侍郎○丁亥諭文綬原係棄瑕錄用之人因其在陝西巡撫任內辦事尙屬認真加恩擢授總督又以四川

軍務爲阿爾泰貽誤而文綬於軍需向所諳習特調爲四川總督令其整頓經理乃伊聞命之初尙似勇往及到任以後於各路糧餉仍均有遲誤一切軍營事宜亦未見其實心妥辦甚至借軍需名目妄請開捐竟爲屬員冒銷地步初不意其乖張若此曾降旨通諭中外並將文綬交部議處尙欲觀其向後是否能改悔奮勉再爲定奪至今年七月內聞阿爾泰在川聲名平常並有縱伊長子明德布向屬員勒索之事因傳諭文綬密行查訪及文綬覆奏惟稱明德布與屬員漸熟往往進見於是人言嘖嘖雖勒索等事尙無實指而阿爾泰縱容干與情弊顯然等語朕以文綬不過就旨奉行其事雖略有因由俱無指實若僅以人言嘖嘖爲憑卽莫須有罪案何足以服阿爾泰父子之心朕從不肯以風聞無據之言輕治臣下之罪復諭文綬於該省屬員內設法查訪據實覆奏

不得仍事含糊乃閱數月之久並未查明續奏嗣因原任川東道託隆回京傳旨詢以阿爾泰任內之事據稱阿爾泰令屬員承買玩器物件短發價值其辦運樹木杉木派令重慶府多辦幫木運京售賣肥己又龍安府知府馬權卓異時聞有餽送之事各款蹟一面傳旨詰詢文綬明德布見在拘禁候訊卽命軍機大臣會同內務府大臣詳加研鞫據明德布親供見已直認不諱並非得自刑求豈有爲子者捏詞陷父之理其非風影浮談已無疑義阿爾泰在川狼藉若此託隆係川東道距省較遠尙能列款開出則在省官員尤當知之親切一經確切稽詢眾人斷不敢代爲隱飾文綬身任總督奉旨密查卽應實力訪察據實覆奏方不失爲大臣秉公持正之道乃竟意存袒徇輒敢蹈官官相護之惡習實出情理之外後任督撫訪查前任之事無難令其水落石出似此肆行

欺罔於吏治人心大有關係若各省從而效尤朕將何以任人是
文綬之罪斷難復追因命富勒渾馳驛前往四川將阿爾泰之案
詳加嚴訊另辦乃文綬料明德布在京定然供認又見富勒渾將
到自揣事必敗露始將劉益前在藩司任內爲阿爾泰扣繳養廉
科派屬員苦累木商等事查出參奏則其從前之袒護欺飾已屬
顯然業經有旨將劉益革職解交四川審訊文綬身爲封疆大吏
如此存心豈可不重加懲治文綬著革職交與富勒渾一併嚴訊
如有應行問罪實蹟卽按律定擬若尙無別項贓款卽將文綬發
往伊犁令其自備資斧效力贖罪以示炯戒其四川總督員缺著
劉秉恬補授仍在美諾布朗郭宗等處督辦糧運經理諸務所有
總督印務著富勒渾暫行署理留於省城辦理地方事務至內地
應運出口各路軍精並著富勒渾悉心經理毋使稍有遲誤不得

以專辦日行事件稍存膜視其湖廣總督事務仍著陳輝祖就近
署理俟勦平金川後劉秉恬再回成都任事富勒渾仍回湖廣總
督之任將此通諭知之○溫福阿桂豐昇額奏金川賊巢惟噶拉
依及勒烏圍爲心腹之地其由功噶爾拉至喀爾薩爾係擣噶拉
依正路臣溫福由此進剿其自僧格宗納圍納扎木至當噶爾拉
亦係進攻噶拉依要路臣阿桂由此進剿至舒常見由綽斯甲布
進兵其俄坡地方係徑攻勒烏圍近路前此僅有土練兵八千名
今酌撥漢土兵四千臣豐昇額帶領由章谷吉地前赴綽斯甲布
與舒常合力攻勦得旨嘉獎又奏小金川演化禪師印係康熙五
年所給見從澤旺處收取送京又於布朗郭宗寨內查出銅印三
一鐫崑州長官司印洪武十一年造一鐫揚塘安撫司印永樂四
年造一鐫別思寨安撫司印宣德十年造檢查四川通志並無此

三土司之名據土人稱小金川地方原係五土司之地被小金川吞併別思寨一印卽係土舍安都爾先世之物其餘四土司年遠無從稽考報聞○戊子調倪承寬爲倉場侍郎由禮部調○是歲朝鮮琉球來貢○會計天下民穀數各省通共大小男婦二萬一千六百四十六萬七千二百五十八名口各省通共存倉米穀三千七百八十七萬二千三百四十九石八斗九升一合五勺